





P1-P2

石寺圍葵葉沙塍長麥苗勞勞誰暫息空見野帝招

小井

綠烟埋草屋碧溜漱荆扉馬渡迂行李人家聚落暉

淺泉瓢可汲密樹鳥爭歸極目香山路閒雲飛

大井

背水循紆路沙田雨過平短簷覆酒氣高樹雜禽聲

野飯藜羹具荒陂柘露生布旗眠瘦馬訊道是防兵

長新店

雙阜河干起歌樓蔭柳廊旅裝集萬里客語辨多方

塞曲鷓絃急燕姬翠袖香銀餅開美醞指點喚人嘗

宿長新店

去國今宵始秋聲旅夜真邨荒雞代漏樹禿影疑人
入夢離羣淚經霜率野身函囊三尺水慙爲照孤臣
別侍者

漫恨征車小香奩不爾隨但思雲遠處莫立月明時
官似樂天左鬢非潘岳垂關河無夢阻夜夜是歸期
將至胡桃原馬上口占

常將山傍馬亂石戴霜明峽樹孤鷗坐松菴小棧橫
千盤狎鳥道五里送雞聲來往十三度無邨不識名

早發胡桃原

驅車過石門朝氣鎖雲根一里無平路三家但小邨
龍窩霜自古虎跡獸皆尊妄慰僕夫瘁空山指太原

暮抵故城

落暉隨馬去薄暮尚孤征野氣開新月人烟聚故城
密林春雪白荒寺夜鐘清旅店驚遲至闔扉問姓名

劉伶墓

一醉足千古頽然臥夕陽白雲蒸酒氣青草沒文章
荷鍤傳遺事豐碑誌古狂知君猶有恨未得葬壚傍

新樂道中

路熟沙邨近凌炎憇息頻淺河橫禿柳碎石擁平津

學沙堂詩集 卷之四
樹合天疑小雲空山自真停驂何所見憂旱輟耕人
綠柳長廊

碧天三十里鬱鬱接城闌絮落風搏雪陰濃草疊茵
雨喧高下鳥晴憇往來人我獨憐張緒風流老驛塵

趙州

趙野方千里茲州獨爾名人猶思鼓瑟壁不見連城
畫水波紋淺仙橋掌跡平無勞懷霸業陵草暮烟橫

石橋早發

逐涼客轡早殘月遠波明柳蜚喧如鳥邨烟暗似城
黃沙連麥色綠戶隱縹聲耳目渾佳景悠然故里情

柏鄉

古蹟東西漢石人立柏人楓陰赤帝廟柳影鄆城闈
白盡田塍水紅飛驛路塵畿南堪羨處原隰尚昉昉
坐獲鹿城西龍王堂

廟倚雙槐迴山嵐面面過女牆白落粉鳥道綠垂莎
傍樹人眠石環門鴨戲波勞勞偶憇此回首憶烟蘿
宿獲鹿

七經獲鹿道旅舍亦驚頻身賤名應隱途窮嬾不真
僕諳新築路馬識舊行津獨有歸巢鳥枝頭似笑人
過固關

郵客非遊客，關真故關家。山疑夢杳邊，塞望人還
石氣團青靄，松花散翠斑。回看來處路，都在亂峯間。

固關和毛錦來韻

雉堞雄如此，甲申敵自西。無勞築萬里，誰信塞九泥。
戍伍多傳子，山農不飽妻。至今崖礪裏，苦霧尚淒迷。

其二

山行不見日，暝色澹重巔。土屋攢霜葉，棉駝關稅錢。
曲衢如互字，深井得朱泉。關吏譏何切，緝逋令甲懸。

其三

出關纔數里，雲樹隱悲笳。亂水三叉口，寒煙五卒家。

山腰懸廟小，石髮漱泉斜。柏井知何在，危樓擁白沙。

山邨夜雨

雨急山難靜，蒼茫鳥更鳴。瀑聲聯一布，風勢過千兵。
天眼電光白，人心霹靂清。翻愁濕古道，客轡滯邊城。

寓太原白馬寺

到處惟依寺，枯心宛戒僧。對人寧諱苦，與物總相能。
千里隨邊月，一編傍佛燈。栖遲吾意慣，翻怪鳥飛騰。

崇善寺古佛

尋幽愛古寺，法相尚崔巍。日月懸珠額，山河照寶衣。
蓮臺多鶴跡，龍鉢有雲飛。此地容遷客，淹留未肯歸。

學源堂詩集 卷之四
古鼎

莫是荆山鑄知從汾水來何緣離泰時翻自傍香臺
殊氣龍文重檀烟玉鉉開雲霞光燦爛豈許沒塵埃

古磬

法雲佛磬滿一擊淨塵心色以香烟暗聲將樹氣沉
殿前清萬籟空外裊餘音欲識何年置相傳宋至今

古燈

一片青蓮影皎然徹化城梵林真不夜佛日與長明
花滿高皇動光寒古殿清但能留一照浩劫有何驚

古槐

蒼然垂古寺秋冷碧香沉地裂虬根怒天高虎日侵
籠烟百鳥靜落日一園陰不散風霜色方知閱歷深

古松

盤松殊可愛日暮澹含青翠髮梳風細金脂濯雨馨
舞虬猶五粒巢鶴已千齡爲借曇光照清霜耐飽經

古柏

四十圍何大一千歲更多藏雲枝罨眉弄月影婆娑
合藥收青子懸珠上翠柯亭亭皆直幹時有雀來歌

古井

紅亭覆古井氣積欲蒸霞繡金田草林圍玉女花

淵源通弱水潤澤到恒沙知有龍聽法常將布幕遮
古碑

傍砌亭亭直欹雲落落聞風霜畱姓氏文字老塵寰
明自舍松影蒼猶抱雪斑計年知四百撰記是完顏

古鐘

寺古門多堊樓鐘獨巋然一聲驚衆夢午夜靜諸天
書虛殘風雨華鯨暗歲年揭來音漸老不向晉宮傳

古鐸

樓鐸鳴天半居高瞰日紅不爭一夜露能受百年風
舌老并州鐵心空蜀國銅佛圖澄有悟曾向塢頭通

古畫

滿壁何年畫衣冠倣晉唐峯巒經雨暗樓閣受烟蒼
蠅篆封鸚樹蛛絲隱象王僧繇與道子碑斷姓名藏

雨中

幽光集雨寺鳥語倍玲瓏松徑花輕落茶厨水細通
鬱沉烟百里瀟洒木千叢愁滯行吟客呼童問蠅螋
王右星入秦

梅雨濕鞍韉王生渡渭川雙睛搜華岳孤劔嘯甘泉
衣帶黃河水風流隴樹烟此行遊亦壯佇有過秦篇

悶

學源堂詩集 卷之四
萬事都堪悶淹留況寺居往來看鳥雀晨夕伴琴書
弱草閒堦滿殘烟古殿虛半生嗟潦倒何日築田廬
自歌遣悶

無以媚吾意紅牙緩度腔聲難隨玉管氣欲破紗窗
墮淚吳小海遏雲蘇大江自知非白雪愁向此中降
自飲遣悶

一杯誰與勸聊以自綢繆巧鳥衝花語疎雲傍樹浮
影賓形是主左酢右仍酬漸老諸情澹惟思拜醉侯
寄張爾成
懷君心萬縷遙訊祇興居酒戶愁應大詩瓢老莫虛

世情看海市宦況擬蘧廬我輩無長技療愁好著書

其二

此身何貴賤損益任蒼翁雷過常多雨帆迴更待風
璞真難信卜劍老豈藏豐細數前賢輩升沉總畧同

其三

三年隨塞雁拓落轉相安道念澄秋月名心澹谷蘭
如愚卽世法不疚得還丹近況蕭然甚蓬踪徬佛壇

其四

回憶金閨日茫茫恍夢游英才分四海勝地下三洲
重聚倘奇事相逢亦白頭與君言念此萬事不堪愁

寺寓偶懷陳藹公劉長馨諸子

家園已可憶勝爻復牽情千里風塵態十年鷗鷺盟
夢于歸去切愁自別來生妄擬諸君子多應念屈平
寄陳藹公時將赴京兆試

旋別旋相憶情深豈偶然奇文人共賞豪氣我尤憐
燕市無千里鹿茸第一筵囊琴莫更碎名噪已多年

風馬

影與聲齊動儼如驟轡來照窗雲幾葉驚鳥日千回
樂奏疑天上鑿鳴想殿開搖搖惟飲露龍種亦仙胎

其二

不與紅塵近行空繞畫楹出簷窺落月入樹雜流鶯
有繫難千里無心任一鳴半天誰剪拂風過不停聲
寫況

近況何堪寫沉冥轉自娛一官閒乃賤萬事巧皆愚
藥裹書囊襯詩朋野衲呼孑然千里外天地此真吾
其二

禪關原日掩我復闕深深僕悶一枰遣予懷半榻沉
晴光明砌草香氣受園林阮籍休彈淚蕭條不自今
五月太原城南野望

望野祛歸思游雲漠漠垂地寒初刈麥雨潤正開葵

學源堂詩集 卷之四
禿樹銜山口孤烟畫塢眉非因送客出恰好是尋詩
過張慎菴寓中遇魯雙峯坐談

無營愁日永握塵欲立談爲過張平子因逢魯國男
舌翻千古案意盍一堂簪怪底悲歌切身皆歷苦甘
過張慎菴寓中與連雨若對談

浮生誰意得偶聚亦奇緣往事真桑海閒愁又杞天
僧窗移樹影客語澹爐烟倘識吾儕意無須更問禪

過金粟寺

只是尋幽慣松關卽卽應樹香來隱隱花影落層層
石洞千聲鳥棉裘五月僧重遊光景別曲磴鎖荒藤

登文殊閣

佛閣崇臺迥晴嵐四望通聳身原上界放眼已虛空
萬樹人家影一天燕子風遠烟纔暝處倏見夕陽紅
分守太原少叅法玉符擢分巡井陘道

絳節動薰風陘關一望中雨隨山色綠日近旆光紅
纔謝扳轅叟旋逢騎竹童恩波如澤水原自晉陽東
訪方邵村于玉虛觀

暇日臨仙觀晴天訪露臺樓空因崔去洞敞待雲來
地似山陰境人非逸少才翛然塵意豁佇立獨徘徊

立秋

清飈何歷歷物候客中真草色看猶淺蟬聲聽已新
雲霞蒼遠塞蘭茝淡孤臣不作悲秋賦蕭條任此身
寄謝冰壺郡倅

十年秋水賦不獨慕才華潞國唐司馬江東謝大家
雙眉橫紫氣一劍吐青霞儒俠誰兼得吾將拜鹿車

鳳仙花

嫋嫋如鳳采綽約自仙姿蝶宿身疑朶鵲啣口有脂
霞明秋露濕玉曼曉風吹客舍無人摘含嬌故故垂

秋夜

客况淒于夜秋風不肯停樹烟千葉老窗影一燈青

哀角驚羣雁游雲澹數星禪關猶未寂蛩語細堪聽

其二

弔影真無味移床坐月陰涼從短髮入愁向老懷侵
風亂雲多態林凋葉有音飛觴狂欲嘯已減少時心

其三

剪燭聽衙漏懸簾對寺樓聲聲催落月處處報新秋
千里雲堪望三更話不休翻憐楚宋玉作賦枉離憂

其四

何處容愁緒蒼涼一榻懸蟹吟知露冷磬寂美僧眠
子夜歌誰奏丁年志尚堅蕭岑籌畫遍欲買五湖船

學淵堂詩集 卷之四
其五

萬類此時息唯餘星斗橫
天高遲沆瀣市遠靜簫笙
不畏文昌暗翻嫌太白明
眼中無快事匣劍吼難平

其六

浙浙驚風馬喈喈動樹雞
鴻音將自北斗柄已迴西
衣薄秋偏早烟深草欲齊
情傷邊塞夜不雨亦淒淒

其七

潦盡潭光碧松關不受塵
狂呼石老丈冷怯竹夫人
亥子看猫眼參商隔兔輪
砧聲何處至偏爲傷孤臣

其八

夜光深院掩長笛倚樓空
蝶宿渾成綠花飛暗點紅
箔沉衝戶露蠟瘦近窗風
詩興雜鄉思銷除旅夢中

其九

逢人藏感慨入夜足悲歌
七月晴光短百年秋興多
吟長寒玉宇坐久落銀河
三匝慙如鳥何時藉一柯

其十

爲庖雙丸迫晨鐘與暮鐘
自能甘鬼笑不更羨侯封
楚子曾歌鳳唐孫欲嚼龍
千年千此夜往矣慎遭逢

秋天

秋空看萬里歷歷一天詩
碧湛雲開處霞明日落時

無風晴亦爽多露夜偏遲白帝方司令蕭森慎莫悲
秋日

猶是扶桑出秋陽澹不寒入辰先應令吹角自隨干
旭送山濛翠光流樹染丹憑高看夕照萬里影團團

秋月

桂魄清宵炯還宜秋夜輝疑霜著地濕猜水上花肥
蟋蟀光中冷芙蓉烟外稀何緣通萬戶爲促搗寒衣

秋風

瑟瑟來何急乾坤到處清披霞無定態入樹有繁聲
澹意蛩先覺寒威草自驚江楓猶冷落遮莫是邊城

秋雨

懸聽聽浙歷細雨不成喧綠野烟生樹紅林霧結村
淺深分草色新舊長苔痕曉霽僮相報花飛夜滿園

秋露

露下知秋早瀼瀼靜可聽珠流荷動掌翠濕樹懸星
遠水孤城白空山小寺青墜蘭真可飲恰欲誦騷經

秋山賦得如粧

綽約秋山態纖妍曉日粧黛眉烟翠薄雲髻樹簪長
五色霞爲佩一天露作香含嬌誰許字白帝是仙郎

秋水

學淵堂詩集 卷之四
練光橫十里森森自澄鮮明比美人目潔同才子篇
鳩鵲晴泛影菡萏首雨浮烟書舫停橈處波舍倒映天

秋菴

菴爾聲何切偏能助客愁清舍一夜露涼帶滿身秋
翻翻風中靜嚶嚶雨際浮不甘伏戶下振羽向花遊

秋樹

莫惜秋林老秋林貝錦如雨流紅葉嫩月澹翠烟疎
鬱鬱看無際蕭蕭聽不虛移床十畝陰倚枕夢蘧蘧

秋竹

此君無俗韻最喜過商飈玉液龍孫長瓊聲鳳尾搖

淇園霜不老嶰谷雨尤嬌王子秋多興依窗聽晚潮

秋蟬

有聲寒卽切淒切更蟬音樹樹喧相續山山靜莫禁
聽時知物候噪處澹人心華矣賓王賦疑當此日陰

秋光

秋光何所著澹蕩水雲間易落詩人眼能銷客子顏
看來千里淨望去一天閒渺渺虛難寫疑從爽氣還

張慎菴旋平陽

霜風挾短襖歸寓亦言旋客夢猶依寺行踪總仗天
一廉招百妬八口寄雙年莫道蕭岑苦人情頓了然

連雙峯之汾陽

孤劍渡汾水秋光滿目浮丹楓金瓊塞白石玉亭樓
作客非長往看山豈浪遊知君有壯志不學仲宣愁

偶見

蕭條偶有見處處得秋思雲起潭烟淨蟲喧草露滋
墜瓊僧打棗摘錦客烹葵無以適吾意迢然坐詠詩

午睡起

愁繁逼午夢醒後轉迷離墻影遮高樹雲花暗淺池
沉沉如病酒兀兀更吟詩旅况尤難遣秋清日暮時

秋寺夜雨

寥落禪關外蒼涼夜雨中祇因雲氣澹愈覺梵音空
雁冷愁無月花濃愛有風明朝添一事秋壑看飄紅

秋日雨後朝望

一夜雷縣樹朝來秋氣空水浮千壑葉霧散五更風
宛宛山容淨蒼蒼水勢雄黯然登眺罷家在翠嵐東
九日同胡葵菴王鷗渚二參軍飲寺寓

勝友聚河汾重陽醉夕曛地憐無戲馬人恰是參軍
菊爛迎寒雨鴻高帶懶雲脩脩塵外賞松寺受清芬
九日李幼庚惠紫繡球菊花桑落酒

重陽無菊酒邊郡懶登臺不道白衣使能將紫繡來

學源堂詩集 卷之四
金英香入座竹葉翠浮杯爲謝仙舟侶狂吟天半開
荅爻

近况書難白長吟發浩歎望人敦古道行已稱微官
雁影臨邊小秋聲落寺寒學僧何事好睡起日三竿
崇善寺雪

一夜雲屯寺松烟澹不流風沉淺水結天挾遠山浮
閒寂林藏鳥蒼茫人倚樓客懷翻得悶五里問新篴

病中問雪

午窗暗欲夕知是六花鋪著樹藏青未穿階印鳥無
野寒雲澹泊嵐近影模糊曠致應如此沈吟費病夫

擬荅

果是花爭墜沉沉霧若封側看松尚綠輕踏砌微濃
雲遠斜邨暗烟茫小岫鬆此時尋鄭老應向灞橋逢
初雪

大寒初應令霰落已霏霏雲挾山光動霜吞水氣微
空軒來澹影老樹失蒼衣惟有袁安拙相將臥薄帷
雪甚

遂失山前路層層覆短松花翻疑鳥舞聲急顛波春
莫訝空堦沒遙知小礪壅白頭瓊笠子門外好扶筇
雪止

雪止非同雨聲光頓寂然竹肥風暗拜烟薄鳥爭穿
花隱窗紗碧光浮砌石鮮寒颼不肯定猶欲兆豐年

又雪

又報天花散輕颼泠泠繁地寒容易白風弱不能翻
壁聳增虛勢堦平蕩淺痕戒童莫便掃畱著襯雲根

霽雪

豁然天地徹萬里淨人心雲去低連樹風來冷逼禽
嵐烟多變態水石作清音詩料今朝滿携囊何處尋

望雪

雪後尤宜望寒光處處開雲邊疑鳥過畫裏見人來

野勢渾無跡山容老不積那堪頻極目村落半蒿萊

掃雪

斂雲爲白谷三徑洒然新鶴斃儼仙客縞衣疑美人
香消一日臘氣動半園春今夜月明後清光喜倍真

烹雪

貧自便清事融花戰茗旗王猷酌酒俗陸羽補經癡
蟹眼雲堆轉松風素浪吹一壺天味足莫問党家姬

張遊擊自太原赴閩海任

豹旌辭紫塞龍劔吼霜清去帶并州鐵將剗黑水鯨
樓船橫海楫橘柚受降城膽落腥蛟窟喧傳博浪名

雪後過紅土寺

望雪疑無路門從土竇開
劈山成梵宇鑿穴隱禪臺
鐘黑懸橫木茶紅煮石煤
老僧無世法頻說宰官來

其二

紺殿依厓闌燈懸午尚清
拜膜從釋禮穿洞訪僧名
十五丈深井兩三株老榿
不須離火宅已覺遠塵情

襄陵道中

數里襄陵路紆迴稻幾灣
一官嗟落落十畝羨閒閒
鴨浴門前水人歸屋上山
堪憐鶯語澀繞樹學絲蠻

上元有感

豈不憐春色傳柑夜早眠
未嘗衰甚矣只是興蕭然
雪白燈紗暗風沉樹影偏
荒城殊寂寂獨有月嬋娟

其二

強隨僮意起驛館據繩牀
春日人秋色良宵我異鄉
酒兵難獨部棊陣欲誰當
還擬尋歸夢雞聲過短牆

過臨晉贈孫柳下明府

問地桑泉古城荒氣似秋雲
深庭下草塵暗驛中樓
俗薄人多黠官廉日得愁
偶來無一可亭子愛休休

無花果

繽紛競萬卉此果獨無花
綠玉仙人掌青雲帝子霞

自能承月露不肯鬪春葩誰爲移荒圃蓬高日影遮

贈馬翁

壯會投筆
老復燒丹

解劍開丹竈買山高結廬須知九轉法仍是六韜書
門對葛洪井池游賀監魚真動有至樂孫子繞衣裾

九日書蒲縣署中

儘有登高處誰爲送酒人窮山逢令節荒署滯孤臣
紅葉辭枝瘦清泉落影真秋深多感慨况是未歸身

平陸

平陸無平路崎嶇礙馬鞵千盤山頂地一尺淵中天
虎過風猶冷蛇藏樹欲穿前邨何處指峭壁乍流烟

其二

穿雲尋鳥道窮日上高峯徑仄懸危石邨墟老亂蓬
鳴鞭驚穴婦乞火叩巖翁水際山城渺秋河滾怒風

榮河

逶迤山徑盡水際見孤城柿葉秋先老蜩蟬午更鳴
到河猶晉壤隔岸已秦聲極目蓮花岳陰陰紫霧生

檢新曆

寶曆頗何早看來獨黯然春遲仍閏月客老又增年
寸卷消今古方圖盡地天侍兒爭問社好爲釀甘泉

除夕感懷

時代實
在都

羈愁容易發况是歲殘時鄉夢浮棕榻塵心靜竹枝
一年倏又暮萬事總堪思物候誰驚早悠悠我意遲

其二

落落邊城久翻憐京洛塵春風動鐵馬臘雪擁朱輪
我固隨飄葉時多歎積薪長安百事好只不媚愁人

其三

寒盡霜威少椒盤泛素羹容稀疑寓僻馬劣怯途生
栢酒誰同酌桃符我不更太平欣有兆羯鼓夜無聲

元日感懷疊前韻

偶談昨夜事便道是年時太液冰辭岸上林鳥轉枝

不爭春日好偏助旅人思嬾慢晨多夢何嫌曙色遲

其二

紫陌朝光滿車闌不起塵俗占浸水豆兒戲播風輪
賤自安蓮幕愁因窘桂薪朱扉猶寂莫况是謫遷人

其三

凄清雖旅食隨分薦辛羹綵勝無新式華衣盡後生
椒蘭熏萬戶鐘鼓靜三更猶喜鄰丹殿松廊遞磬聲

李生園

漸有林泉興偏宜過辟疆入門花覆徑穿石竹綠牆
蟋蟀秋聲冷藤蘿暝氣蒼自慙塵滿面相對芰荷裳

砥柱峯

屹然三峽立萬派自周旋
濯雨垂青玉飛濤亂翠煙
氣凝天地穩勢險鬼神懸
不是狂瀾障誰能涉大川

襄陵渡河

此水凡三渡愁心重野航
河身秋自瘦木氣冷愈蒼
舟楫何人用風濤去日長
鷗盟如可踐那更問津梁

落葉吟

何處不秋風秋林風獨雄
一叢烟忽散萬里眼憑空
翠積丹崖下瓊飛白積中
蒼虬三五樹猶自鬱葱葱

其二

欲作干霄起莫令蔽日繁
自天飄故遠到地色猶存
香氣投蘭畹幽情點石門
不隨蓬跡轉落落託雲根

其三

任底秋聲靜林疎鳥不搏
尋幽山徑響眺野暮雲寬
雨後光猶潔風中態自安
莫嗟人不賞料得返條難

其四

零亂如裁碧林荒秋氣偏
自甘隨野馬豈肯抱寒蟬
榮落天無意低昂地有權
龍門桐百丈霜裏影孤懸

寺寓夜坐

客倦翻難寐閒心對燭吟
碎風喧塙鐸孤月動松禽

語靜春星寂愁長畫角沈此身還落落歸思繞園林

挽季天中

官給諫以抗疏
謫徙歿遼東

尚冀金雞下那知玉賦催君身終報主人意始憐才
夢冷梧垣月魂冥瀚海雷遼東鶴可化瓊觀好徘徊

季家
維揚

王雨若教諭柏鄉

行登博士座且繫孝廉船野水桃花漲春風雁字天
攜家就五斗入署落三鱸見說詩如畫風流比鄭虔
春日邀同王惠迪王雨若劉長馨飲郊園杏花
分韻得刪字

素侶開軒集塵情仗酒刪林光風習習花氣鳥嘯嘯
嫩草疑含水春雲欲學山園丁畱爛熳擬待客重攀
徐鼎玉招同陳藹公飲郊園

尋春能破嬾繫馬動花闌未坐先呼酒不謀同脫冠
晴絲高鳥帶野氣遠邨團爛熳傳歌笑遊人爭聚看
次劉長馨郊園社集冬字

與高不暇嬾綠野散遊蹤選勝停花圃降愁仗酒傭
苔痕石著繡樹影水蟠龍益識乾坤大疎狂我輩容
讀李舒章乙酉遣草

不肯畱封禪新編屬爰藏一官纔小鳳多賦擬長楊

寫恨風而雅含愁騷不傷憐才須後世箇曲聽山陽
穀日郊行

選日試征衣晴光野望圍馬鳴千里意雁影一行歸
卑樹雲容嬾蒸田雪氣肥髀生傷老大轉欲羨漁磯

郊園社集

荒野人蹤寂惟餘滿徑蕭閒雲常入檻野水不通橋
地遠晴愈敞春深花更嬌獨慙官反賤換酒乏金貂

賤日感懷

萬事惟年長一官與望輕漸能安老態不敢愛虛名
意氣憑盃酌人情付奕枰乾坤有缺陷齊物笑莊生

其二

愁重憐心弱縈懷不到貧紅顏寧問命青眼亦妨人
山喜尋愚谷河疑見妒津無須辭鄙賤天地足風塵

其三

白髮苦相贈青箱意獨濃課兒抽史句把鏡想童容
日月三蓬矢山河一竹筇無才還自量從不羨侯封

其四

時清窮亦可百畝靜生涯但約吾敦樸敢言俗尚華
愛鄰多種棗畱客止烹茶五岳何時去休糧欲飲霞

喜晴

既霑晴亦好萬里動和風
邨柵驅牛出田塍放水通
絲柔鶯綴柳草潤繭胎蟲
况是桃開候春霞滿日紅

撥悶

日影滯窗痕沉沉晝不暄
行藏吾老態天地此空軒
擬詔封花爵添杯賀竹孫
靜中幽事足吝與世人言

立秋

何須驚墜葉景物已新秋
翠蛩鳴深柳青葭隱細流
興多爭似杜賦雅不如歐
怪底行蹤滯人隨斗柄游

新蟬

乍聽前溪樹新蟬已亂鳴
葉深難辨色谷靜不藏聲

三匝同鳥鵲一枝借野煙
不能寒抱葉安得配貂榮

乞箭許將軍

秦人

青管無花夢幡然學拓弦
摘梅工柳揮落羽羨高駢
材自會稽美法應馮翊傳
一壺如可乞率爾看楊穿

掃荒塋

五載誤朝簪松楸入夢深
樹空無鹿觸麥秀有羊侵
指隴教兒拜提漿爲弟斟
右軍當日誓差可作銘箴

七夕立秋

七夕星纔動三秋露始涼
乍看桐有井不信鵲成梁
節合憐天巧河明覺夜長
豪家競譙賞結綵帶寒芳

送程天衣守脩赴闕任
數年晨夕聚我獨識君情遊戲一官老蕭條萬里行
鄉音攜李郡戎馬晉江城努力圖麟閣雲飛舊有名

樊天木令應城

作宰人嫌劇君才喜刃游山城民訟健江國吏心柔
好爲歌棠計莫因飲水愁漢家循吏重卓魯各封侯

郭雲瞻令博野

才子今獲縣華疆古博陵鳧飛六月雨琴卧一床冰
有斗何人賦無襦此日與上官難善事君或擅兼能

孫思遠歸揚州

來去渾乘興尋仙無定踪紅林驅瘦蹇白水慶荒墉
到處招醫忌逢人受酒封揚州行藥便只莫采芙蓉

量移

問年強仕逼華鬢鏡中新老至心先得在因病不真
雪霜狎遠塞日月澹孤臣同學誰猶賤蹉跎笑此身
重過玉霄宮訪方邵村

猶是烟霞地重遊意豁然文章原腐物辛苦卽神仙
鳥語臨風巧松顏浴雪妍此中有道氣那向福人傳

送羅鶴儕世兄遊晉歸南昌

絳帳南州遠青驄西國逢照人千尺壁結氣五花龍

遊橐輕春水歸心動曉鐘過庭如有對霜鬢說林宗
快圃

爲圃不三畝居然野趣賒護門安水檻留客驅畦瓜
秋草閒亭遠夕陽老樹斜一丘堪自適豈是癡烟霞
快晴

地偏晴亦好白日豁閒心影水青筠竹藏花翠羽禽
無人來爽氣有樹起空音此意誰生受悠然靜我襟
快雨

蕉竹一園喧蕭蕭暑不屯葛衣秋入座藤格霧當門
樹滴池多暈花流砌有痕爭如著短笠烟雨看漁邨

快風
秋早風來爽空亭晚更涼蟬聲咽密樹花影亂橫塘
颯颯雲多態蕭蕭木有香迢然吾自得不覺是羲皇

快月
園空月易滿皎皎一天浮人影涼于水花香澹得秋
魄懸孤樹立雲動野星流絕爽登臨目何須賦倚樓

快飲
世事只堪醉一杯水竹間風光逐日好天地幾人閒
戶大容清聖厨貧供小蠻酒榼名頽然客乃去明月滿

柴關

學源堂詩集 卷之四
快讀

半生航一卷檢點就林臯紅字花垂影清音木疊濤
夸嫌盲左傳愁息反離騷不解于原甚翻云學老陶

快書

不忍投青管時將晉帖臨辨香尊快雪卮酒對來禽
健豈因狂得媚仍向拙深臣書誰第一種柿滿園林

快奕

無以寄吾傲枰聲剝啄然局殘常落日機密不聞蟬
幾點洛書跡雙分星斗躔坡翁原信指小結橘中天

快譚

視舌欣猶在譚鋒未肯平掀髯驚落葉擊節送秋聲
快矣石能點豁然風欲生床頭妨劒嘯只不到人情

快歌

歡來檀板動不擬作新腔疑鳥窺朱戶驚花落玉釭
百年傷小海一去想東江多寡莫爭和繁愁借此降

快眠

歛愁歸一枕無夢入檀蘿白醉人言少黑甜酒力多
暗香花墜席清影日移柯忽忽醒如失秋光滿綠莎

除夕

壬寅

除夕除何事愁將老並加囊空裁俗禮身賤惜年華

學源堂詩集 卷之四
一夜中分歲千門各潤家占春或有驗銀燭綻雙花
元日 癸卯

年華隨柳變春色正氤氳改歲惟增老違時只好文
人矜新日月天作巧風雲感歎浮椒酒吾衰未有聞

贈井翁

常笑陶彭澤歸來始種松何如渤澥叟徑不受雷封
萬事酒杯澹一生碁局濃寄家津口樹來往看芙蓉

除夕感懷

庚戌

老人愴節序爆竹忽傳聲兒喜新衣履厨忙破釜鐺
一官真戲局百畝竟浮萍此夕吾多感誰家弄錦箏

其二

檢曆惟年長頽唐我自知耽閒因物付好勝任人爲
鍵戶纔停筆傾觴又祭詩飛光吾勸爾何不去遲遲

其三

朝衣自檢點趨闕早尋常報國無他事微臣獨此將
半生遭鷄雀兩載對縑緗利達求誰得徒教鬢髮蒼

其四

我亦宦途客窮愁歲不除妻孥五斗粟兄弟數行書
心事黏門帖人情餽土蔬敵裘冬幸暖豈復怨麤疎
春日步寄快園觀種樹

春色園林滿風光同不同花烟疎老樹翠秀密新叢
好作十年計莫妨三徑通驚心與濺淚杜甫句徒工
賤日寫懷

不自知將老勲名夢寐中白雲時在眼青史日填胸
好馬逐行隊畫龍奪化工此情難寄託澹泊轉沉雄

其二

豈敢傷貧賤年華耗蠹螢愛臨王畧帖愧比佛名經
繡虎莫言貴金蠶獨有霧須知人意洽不在眼雙青
馬殿傳進士歸項城

卽策看花轡行行著錦旋文章今日信經濟幾時宣

赤羽熟梅雨黃河酸棗烟中流應擊楫莫讓祖生鞭
書雲中李翁傳後

雲中有高士苦縣得仙根行業當時重風流此日存
一言直破膽萬卷遠貽孫俎豆鄉人意將無是鹿門

金君選守澤州

猶憶高都境巘岼倚太行沙田耕細鐵茅屋戴繁霜
慷慨人鄰趙勤劬地比唐知君能作牧不愧謝庭芳

孫子白廣文赴唐縣

以君英氣發與我冷官同地接恒山色人留古帝風
白登今晉地太乙古燕宮教學原相半魚飛頻水中

典試出都

紛紛皆奉使星駕指中州潭柘塵藏雨桑乾水漲秋
火流聽蟋蟀雲動策驂驢回首青門路祥煙迴鳳樓
渡涿鹿

馬背十年老輕矧喜一撐秋橫雲際鳥烟抱水邊城
鶴觀松多秃虹橋沙欲平往來爭渡客名利各含情

渡漳沱

秋沙十里白沙際滾黃雲野氣橫蘆渚荒風起雁羣
大河原一派全趙此中分自昔名危渡濤聲不可聞

邯鄲道上口占

古人驚夢處夢夢我經過日月停畱少乾坤更變多
莫矜心血足其奈髮毛何待得黃梁熟滄溟長綠莎

車騎關

千里總嚴程荒坡驛吏迎近山狎虎豹凶歲擾鯢鯨
官柳一行悴人烟幾點清關防勞郡倅可是重弓旌
早發趙州夜抵梁園店

三城一日歷不敢嘆勞形撼撼蝗飛雨蕭蕭馬帶螢
鐘聲秋水暗人氣野燈青蒼莽來深夜真稱是使星

豫讓橋

千年尋霸跡只得此橋存不識成仁意猶傳國士恩

石藏驚馬氣水抱斬衣魂亂後人經此將無有愧言

渡漳河

野色連山曠秋烟過水寒河流雄似瀉壞樹老為官
蛟窟埋銅雀仙風駕賀蘭往來競渡者可到劔泉看

相國寺

水忠後寺址僅存賈中丞重建

寥落千年寺蕭蕭歎陸沉碑留殘碑甲佛出老龍濤
紺閣延高嶽香臺擬少林宰官乘願力飛樹橫鋪金

渡河宿北岸大公村

渡口臨樊圃河滸逼宋臺暝烟堤柳暗林火驛樓開
十戶圍紅葉三更酌綠醅析聲嚴野署感歎令君才

延津道中

恠底無河患岡砂擁亂荆客從鬼火過牛向血田耕
霜白纏酸棗狐黃閃破薨沙門四十里來往見防兵

磁州道中

滏水邯鄲盡磁山鄴下分秋塍迷野潦堤柳澹疎雲
田鹵稻猶穉河狂沙自墳驅車行役急百里未斜曛

比干墓

讀史傷殷事狡童殺諫臣一朝捐七竅千古足三仁
墓草羸羴嚙夕陽老樹皴寧王封有意幸不用其身

入闈

典禮升賢重文章
司命尊天風開桂苑仙
樂導雲門勝地周伊闕
才人梁孝園使星雙入
豫千騎不聞喧
登樓遠眺

躋高當野步四望極城塢
嶽色卽雲色林煙半水煙
雁來沙際小塔出樹頭
偏河上人如鷺咨嗟運柳船

鎖院虛聽

乍鎖深深院
牕虛靜可聽
陸潮人語沸
秋嘯鳥音冥
笛曲渾難辨
僮駟不肯停
愁來嫌夜永
兀坐一鐙青

山觀夜鐘

院迴臨山觀
鐘聲枕簟流
因風來斷續
送月轉遲留

驚還定人心
醒得愁况聞
鷄喔喔萬事五更頭
軒牕夕照

且喜軒牕爽
其如夕照偏
荒荒原廢邸
杲杲况秋天
積濕擁餘暑
虛光逼暮煙
但于一事好
老眼對殘編
露草鳴蜚

短草戎戎濕
莎雞振羽遊
花間先浴露
石畔續吟秋
誰解王孫語
偏教謝客愁
計時應在戶
趨趨欲何求

秋宵響雨

秋夜已蕭寂
霏霏乍有聲
灑楓喧落葉
濺菊動寒英
得句難安枕
吮毫屢易繁
空堦滴不歇
辛苦念諸生

酸榴下酒

道是酸榴好錦囊珠一攢梅心却遜澁橘瓣但輸寒
紅友絕交論青州行路難停盃還失笑知爲覩儒冠
李與偕下第歸豫章

蒼莽憐春色斯人下第歸去來足萬里辛苦罷三闈
旅夢聞天漏江關見水飛豐城藏劔魄夜夜有光輝

送王雲牒令南鄭

王子喬爲宰雙鳧去漢中地連巴峽棧人帶隗囂風
橘柚江南綠雲霞渭北紅漢廷循吏重屈指拜三公
屬老僕葺敝廬

我久有歸思歸時不緩行吾廬須早葺汝去趁秋晴
莫剪沿牆竹全驅穴壁鼯蜩蟬聞滿樹畱著伴書聲
寄李含白

爲問滹川叟年來興若何含飴應遶膝種秫定臨河
鴉樹秋風滿碁朋夜月過人如勸鑷白畱著伴吟哦
送張素存編修歸省兼寄太翁公選公

我友如張仲藜烟共五年龍門隔舍迴
寓近高陽相府芸閣
借書便意氣澹相得詩文苦自憐秋來忽見月歸買

潤州船

其二

輕颺南面受瀟灑美君行黃菊看時綻緇塵去日清
尊罍逢故友封禪憶難兄十載瞻雲意先馳到呂城

其三

秋烟明畫舫楓葉冷銀魚露下東昌酒雲隨太史書
歸程兩月後來限一年餘著作須燕許金蓮待石渠

其四

聞道山公健斑衣戲雁行文章名父子江海好家鄉
霜月金山靜鱗魚鐵甕香德星占聚處深柳讀書堂

秋日病中

吾意已寥落如秋如病何窗間雲聚散枝上鳥悲

醫自猜肝火書偏引睡魔百年空過半豈忍更蹉跎

龔祖錫稼部擢通州道臬僉

相違纔一舍行亦唱驪歌憲府左馮翊清風通惠河
次荷民訟健投刺客船多破柱君能爾弘農可問麼
秋海棠次范覲公學士韻

幽人當晚弄不忍賦悲秋自有天然媚何須露點稠
斂香辭蝶口含暈老池頭十友誰同調芳蘭氣味悠
其二

北窗紅不老恰對晚霞收影落蠨螋塞香寒翡翠樓
太真嬌午睡西子醉新秋借字春葩好翻嫌促織啾

和程周量出守桂林畱別韻

黯然綠底賦投分廿餘年我比馮唐老誰將嚴助遷
雲深雙闕迴馬瘦一囊牽回首梅花外長安在日邊

其二

宦味無中外才人戀主恩一朝炎徼客十載日華門
人去壺觴洽情親筆墨繁莫愁香案遠笥草總天言

其三

此行元自壯莫與嘆鸞棲五嶺虬龍接三江翡翠啼
蠻烟天聚散戍壘日高低况有懸魚處衙臨白竹溪

其四

桂林饒古跡吾友况多聞揭帝塘猶在廖家井不羣
入山龍隱畫過峽海南雲如雪山峯石誰偏勒五君

桂山有石刻五君詠

其五

遐荒非百粵貢篚日南通築石秦邊徼標銅漢將功
天懸荔子外人在桂花中朋輩長安滿書成少去鴻

其六

去去湘江上行行梅雨間知君爲遠宦因我憶清班
郡遠相思水詩成獨秀山朝廷方減賦檉布緩諸

蠻

其七

金章尊太守玉署老詞臣對酒離今日吟詩憶古人
莫憐把臂少只願寄書頻龔遂與黃霸績成亦苦辛

其八

茶頭傳客刺道是使君辭酒勸悲歌地梅開風雨時
無錢添鶴口多句費烏絲蘇白皆爲守風流千古知

其九

萬里鄉間遠十年雨露深襜帷欣出守桑梓便相尋
印綬驚先覺霜毛幸未侵俶裝清獻似擔鶴與囊琴

劉允公同年令興縣

萬壑千巖裏居然縣獨興以君隨鶴去茲地菱棠增
歌聲雜塞曲花種半河菱錦績二年就循良佇特徵

題顧見山畫

憶昔萬泉道居然是此圖松烟纏小寺霜氣斷平蕪
望望皆虛白行行太藐孤當時憐畫料看畫轉踟蹰

其二

山色空濛裏人烟落照中短簷分左右高樹間黃紅
靜寫深秋意寒生薄暮風爲憐兀坐者可是鹿皮翁

馮胎仙庶子九日雨中黑龍潭集飲和韻二首

冷雨催花急秋光歷歷開客誰嘲落帽人自愛銜杯

水闊孤雲斷風平野鶴來猶聞逸興者攜榼上楓臺
其二

小樓當遠翠烟樹起何從赤碧黃三色西南北數峯
客懷今日曠詩興古人濃雨霽看霜葉山川總醉容

題畫

扶筇尋竹塢曲磴不愁迷山氣晴生樹泉聲夜落溪
鳥隨雲上下人逐月高低約交彈新調桐君遠獨攜

其二

一艇放秋水秋風滿釣竿如妝山點翠似醉樹懸丹
濯足知遺履科頭想挂冠自然非范蠡無乃是張翰

怨菊

拚與寒花醉其如不肯芳既然高隱節莫亦畏清霜
長短微舒碧徘徊懶吐黃澹人今昔有餽祇媚柴桑
二月十三夜大風

一夜雷懸樹危樓勢欲移沙強奪燕壘墻弱破雞埕
刮地威何甚蒙天力可支幸逢春雪盡花信未應遲
乞米蘇次公侍御

投老甘鄉味非關陳蔡窮半囊小蕙苾一碗輒葵菘
腰已輸陶令帖猶學魯公他年傳細事佳話與君同

乙卯生日

不敢諱言老今年五十三鏡中驚一叟膝下舞多男
祿薄官原冷家貧書可耽關心惟庶事諸將耐征南
乙卯三月書遠樹壁上

無可寄吾傲荒園每每開會心且據樹放眼幾登臺
花是去年色人非當世才悠悠誰共語惡醉却傾杯

其二

天意容人懶閒心事傷經綸蛛四壁錦繡木千章
草逼亭堦狹風迴井檻涼池頭幾片石不是禹餘糧
賦得老鈍晝多眠

我與人同夢嗟余夢獨多有懷皆退怯無事不蹉跎

卓午繩牀靜空齋竹簟那起來搔首問無奈旻天何
乙卯四月金棟存太常招同楊地一少司馬曹
顧菴學士沈繹堂大司成張爾成銀臺項眉
山學士雅集分韻得一東

此日歡能聚休令聳暫空問心猶少壯屈指各西東
注玉饒無量投瓊叫不同座中嚴酒政不許說窮通
書呂文甫扇頭

我懶談今事君能識未來櫬槍何日落雲霧幾時開
地冷偏難雨官貧自不才西山如可買急欲剪蒿萊
送韓輝序丞猗氏

學源堂詩集 卷之四
猗頓古巖邑單車我舊游人情常愛虎天氣易悲秋
白嶽雲中見黃河木杪流丞哉君不負早晚聽歌謳

其二

萬里曾爲宰一行乃聽琴好看馴雉事莫動羨魚心
雨綠桑泉草風紅雷澤林謾言遷擢易無術點黃金
夏日寄快園獨步

無客驚門雀園林宛轉行老松孤抱翠小草漸敷榮
日澹遊人少風狂野馬生感時何意緒愁聽桔槔聲

樓眺

久懶憑高望胡然倚檻間啁啾各樹鳥縹緲一窗山

大輿雲俱動風將日並殷低徊收倦眼轉欲學冥頑

乙卯四月二十九日邀同館諸公雅集寄快園

和曹顧菴學士韻

馬痕常掃斷羅雀鳳城西白榜無枝挂青雲有町畦
三眠柳可蔭七尺棗難齊夢與藤輪熟飛騰厭鳥啼

其二

有客來攜李鬚眉風雨蒼人猶湖海氣衣更薜蘿香
心澹悲歌少時艱感嘆長白頭燕市叟爭識舊班揚

其三

話舊情愈切奇峯對夏雲兵戈何陸續消息總傳聞

杯酌臨芳樹盤殮就圃芹唾壺揀共擊深坐莫辭醺
其四

柴對西山色藜無太乙精好謙石也丈虛貴月而卿
齋掩龍唇按朋來鱗眼烹別君又五載世事幾紛更

其五

自憐枯寂甚安得碧山魚五斗裁金馬一鐙老石渠
臨池知彼岸感鳥愛吾廬豪氣除方盡時賢願不如

其六

蒼屋角樹朱紫眼前花有術教調雀無文記捕蛇
醉餘蟾蜍落讀倦柳暉斜嗜退吾如進何須嘆繫瓜

五日

天中今是節大野已荒蕪幾點檣懸火一囊米賽珠
酒無消暑力艾豈避兵符誰復龍舟競旌旗正滿湖
閏五日

何勞天閨節又是一番愁有酒無蒲泛多風少雨流
換符增鬼怕繫縷祝兵休祭屈不嫌再湘江柰隔洲
夜坐聽雨

趁爽坐三更丁香葉作聲雨來喧亦寂月隱暗猶明
竹醉戎戎拜荷翻細細傾田家聞已慰况復洗戈兵
造翹蘖

奢想東籬醉釀材屬婦儲玉塵荷露濕瑤片海苔舒
只許參軍枕莫逢帝子車誰能作酒醴吾與誦商書
夜步寄快園

秉燭昔人意窺園夜氣真石存山意思花借丹精神
草際青絲濕風前白髮勻所嗟樹間鳥昏黑尚翻翻
雨中看僮移花竹

園荒花卉少何不就軒栽趁雨藏葵足疏池保竹胎
近人鳥懶下除草水爭來位置憑吾意休矜爾輩才
師嵩丘妹丈來都相晤

衝暑來何事將無造鐵船問知鄉穫麥苦說吏貪錢

別後兒孫長途中羽檄連相看都髮白身世轉蒼然

題小像

遂以此爲我安知我是吾傲曾無白眼奇豈在黃鬚
只解傳書卷分明入畫圖沉香熏不得半百愧懸弧

劉潛夫儀部貽瀛桃

客老思鄉味瀛桃况果珍麝香紅失艷瓊玉片含津
方朔食應慣天台遊是真知君貽我意立觀好吟春

題畫冊

山曠白如霜危臺起路傍背流多古石隔岸幾垂楊
婦子薙田去人家老樹藏畫圖真可羨定不說兵荒

屬僮於寄快園隙地盡種鳳仙花

莫教他冷落浪種鳳仙花處處天孫錦時時帝子霞
去來容蛺蝶濃澹引蒹葭玩物庸吾意不然負歲華

苦雨

所苦不寧雨露霑復奈何苔翻頽短壁烟冷沒長莎
客下堂前馬衣黏桁上螺獨憐傳羽檄來往尚如梭

懷丁泰巖觀察

君去吟棠樹不寧老友然人情南北別世法夏春偏
善事君丹筆窮愁我白顛平生要自在此日柰何天
鄉人來言苦澇

不雨只不雨一雨便成霖水氣高茅屋波光動棗林
鳥饑飛忽落蛙樂聚還吟時下催科急誰能問伏陰

李湘北學士以曹顧菴學士白浙至王阮亭儀

部自山左至招同沈繹堂祭酒陳說巖學士

雅集分韻

雨氣沉秋暑平泉看飲虹詩才宗越絕客語變齊風
文石魚宮碧舜華露井紅時艱身置散豈復嘆途窮

其二

一蟬噪兩樹露坐受清颺有酒消今日無愁憶往時
玉簾香自遠石丈臥難移南北談鄉事如歌黃鳥詩

其三

負才都不小只是興蕭然何酒一千日誰家尺五天
懶雲垂短樹飛鳥入清烟醉裏籌身事素餐三十年

其四

諸公吾畏友嘉會此清宵腐氣浮霜鬢雄心付草橋
蘋婆秋著色桂子夜生苗礪礪曾中立平將綠蟻澆

秋興

物候愁人覺單衣入座涼花房都抱子草穗亦含香
淺水一邊白繁林幾葉黃淒然無意緒秋氣滿繩牀

其二

三十窺中秘今年五十三升沉皆樂事衰病了奇男
氣逼秋雲斂心空暮雨含妨人惟傲德結襪可誰堪

其三

縱目凭高榭雲埋半壁天風聞西塞馬滂見北人船
所願惟庸福相期是晚年近來心境寂多樹不聞蟬

其四

遂使仙霞阻閩江一點腥旌旗縫婦襦芻料算民町
我尚憐周處誰能問郝經鯨鯢來曬甲壁壘對江汀

其五

天趣偶然發擁書當百城官原閒地位貧却好聲名

閉戶心千里懷人夢五更此中如槁木只待紫芝生
送楊亭玉孝廉之淞江廣文任次梁玉立大司

農韻

旅况驚寒露歸懷動爽天心情戀老友聞見飽經年
涼月燕臺雨秋江米芾船賴依司業久不欠酒家錢

其二

一瓊乞便得好去寄行窩官品難兄並人才高弟多
圖書翻瓜望苜蓿煮菴摩載酒問奇者菁菁竹作歌

金方籀令廣昌

邊縣君爲令知游刃有餘沙田成賦早石戶見官疎

嶽色千年古秋風六月初關門常度雁來往便家書

秋感

自是安劉計其如老鼻驕黔驢終畏虎蜀棧竟焚囂
甲肯從天下兵當指日銷頻年勞叔子豈忍賦逍遙

其二

國恩姑錫券逆節徑稱兵海滋寧爲阻淮陰尚未平
虛傳南越僭猶幸郝經生纓繫非難事受降莫築城

其三

泛濫吹簫客倉皇敢弄兵威風憑錦繖沴氣動蠻旌
桂樹屯腥老灘江滴血平伊誰專制閩咫尺任縱橫

其四

一旅蠶叢破刀穿來歎衣豈同卿子殺誰入蔡州圍
賊壘雜羌種王師頓武威近聞蜀道易來往任封豨

其五

謾道伏波老銅猶百粵標如何勤下瀨猶未破南湖
山雨金城白樓烟鐵漢銷不知雷海上誰復響金焦

其六

擊楫寧無意雞聲漸漸荒杜吟秋亦苦謝客眼曾傷
白髮欺人甚青雲指路茫牀頭濁酒在拚與醉青緇
九日再登遠榭

一日兩登眺秋空愛水連紅藏松寺樹白散玉泉烟
天近好相問人高反自憐長歌忽獨嘯誰識此因緣
邢六吉令平順

孤城萬仞山鳧鳥下雲間玉峽無兵氣虹梯有豹關
地高雙雀舞人樸一琴閒石室藏書在行春好獨攀
除夕 乙卯

世事何能歇今宵喜暫除人爭新氣象我惜舊居諸
夜色一燈靜春風萬卷舒獨憐兒女意只解鬪鳩車
其二

檢曆惟添歲傾杯擬祭詩老懷濃亦澹新事信還疑

春向朱門早雪將白髮欺
心情無不可懶拙更相宜
寄快亭落成

草草爲亭子悠然野趣長
虛牕延月影微雨受藤香
人拙于焉靜園空無可荒
一杯復一卷遮莫在羲皇
趙日章孝廉教授敝府

我輩官都冷君尤冷處居情同毛義檄經是馬融書
閣靜藜堪照池空藻不疎明年期盛事博士聽傳臚

東日者

嗟豈不知命平生悔吝多
馮唐老已至蔡澤安如何
對鏡失青鬢吟詩縱白魔
勝天誰有術吾意久蹉跎

六月六日少司馬楊地一銀臺張爾成水部顧

見山寄快園雅集和見山韻

折柬高軒集林深地轉幽
一天梅子雨六月蓼花秋
易水寒浮淺西山翠點樓
知君有逸興畱壁畫滄洲

其二

知己無多輩高談金伏中
相看塵鬢短莫放酒杯空
竹鳥啼殘露槐蟬靜晚風
夜遊安用燭三徑正螢紅

再和顧見山韻

京華六月暑得樹覺情幽
况也花催酒因而雨送秋
早蟬喧月榭短燭護風樓
慷慨非牢落家原易水洲

其二

相知餘幾輩歡嘆各懷中月上羣星淡雲流一徑通
草新深淺色樹老古今風對客拚先醉愁顏借酒紅
夏日寄快園集同館小飲

寄託林泉興結茅水竹間拂牆七尺棗對几一卷山
掃徑畱苔甲停車倚藥闌銜杯誰與勸花裏鳥關關

其二

勝爰開軒集人閒地氣涼座因碁局密話對酒尊長
松老子垂徑竹繁孫過牆伊誰忙襤襪吾輩且徜徉
立秋後三日喜雨

三夏難霑足秋新雨且長綠紛失老葉紅綻得寒香
晚稼欣纔穎汗田幸不稂漕渠無淺漲飛輓達天倉

書王四表弟扇頭

病愛門題午苔深客跡疎偶然來表弟勝似得家書
問訊桑麻好將迎風雨餘無須詢我况慚愧承明廬
燈下菊影次李與偕韻

背燈儼若畫佳色幻虛名有辦香難嗅無風舞不聲
仙人空采掇隱士夜分明獨爾霜飛少莫嫌枝葉輕
再和

愛花愛及影種種總同名白露知難下玄蟬空復聲

學淵堂詩集 卷之四
枝長隨炬淡藥細借烟明無夜不堪賞真將九日輕

送沈雲中督學江右

沈以麟
經起家

官以文爲憲人才百粵收名書金鑑錄曠覽海山樓
韻正蠻音少經傳魯史畱瓊波何日靜驅鱷賴韓侯

寄懷汪北溟給諫

老懷偏憶舊好友漸稀疎寂莫誰相念蹉跎祇自如
文章因命賤世法與囊虛君在山深處秋晴好著書

贈張醫

外科

吾里有張仲真能讀父書鍼龍傳異術鞭草按皇初
杏樹紅三月橘泉香一閭瘡痍民正甚安得借君舒

九月苦雨

九月苦滂雨紅林重不凋泥深欲一尺柴靜已三朝

澹菊迴秋色遺糧見冷苗村醪強自進窗竹聽蕭蕭

送魏善伯還寧都

善伯久館范觀
公學士宅中

野水蹴天浮君纔買去舟世情資笑話歸計穩窮愁

露下江楓冷帆開海月秋翠微莫便戀知己在瀛洲

翠蛟潭

水煙蒸石黑冽冽翠蛟宮終日常疑雨雙山不讓風
畫眉鳴柵翠刺角迸霜紅潭影青蒼變夕陽返照中

李秋濤令岐山

學源堂詩集卷之四
十年欣道合百里喜符分周鳳高山跡必琴永晝聞
荒邊人狎虎古岳樹棲雲紫氣看君去函關日未曛
雪中樓望

傲寒憑酒力眺雪倚危樓海色頽雲集人煙市氣浮
藤蘿藏古寺臺榭聳諸侯恠底袁安卧閒心易惹愁
歲暮感懷次申隨叔太史韵

淪落羌余慣早棲意亦安老能耽寂莫拙自得艱難
知恥家園薄違時人面寒梅郎真可謂宦跡比鮪竿

其二

壯懷果不寧翻嘆誤相期落拓從吾好頑冥與世宜

快談皆罪狀惡友是嚴師五十知非晚慙余更幾時

其三

豈無矯矯意特立莫容身庸福天心厚高明鬼瞰頻
因人一日熟好古百年親恠底前賢輩相邀會率真

其四

自許除狂態狂多未可除敢言我法是却笑世情虛
宛轉新朋輩逡巡舊直廬年來何事好中秘又窺書

其五

問心猶少壯一鏡滿頭霜戒已投綾刺因人記錦堂
曾經關塞險何恠面顏蒼垂老承虛寵封侯得醉鄉

其六

繁華曾入夢心澹是非餘態腐應人厭官貧願友疎
藜分劉子政書愧路温舒老可清齋便年來只飯蔬
醫來卽熟客妻老是良朋責子無陶句書聲午夜燈

其七

降愁憑道力愁重苦難勝愛種忘憂草不藏醒酒水
其八
歲歲嗟虛度才名甘讓人畫龍羞易售調雀老纔馴
世法多相左人情薄是真公紋生相淺豈敢羨華津
聞先大夫入邑乘

先人有獨行藉甚在鄉閭登領金華誥新編銀管書
家聲陳紀媿文字蔡邕如企慕前賢輩瞽宗俎豆臚

春暮張爾成捕卿招同李書雲余佺廬王北山
三給諫摩訶菴看杏花

破懶尋春遠招攜石竺間興高卽暇日地僻况禪關
樹裏千聲鳥尊前一帶山登樓憑眺遠不負此官閒

其二

野曠春愈媚林煙綠一圍遠公容設酒曾點未成衣
坐樹鶯聲老蒸田水氣肥閒雲如有意故故傷人飛

春雨

一春無不陰今日雨淋淋響入丁香碎涼生丙舍深
燕於水口落雲向石頭沉徒有窺園興翻成獨坐心

春夜雨

雨聲憐夜靜况是暮春時鳥濕戎戎動簷高滴滴遲
遠鐘疑斷續獨樹覺參差積水莫教涸明朝灌竹籬

生日劉賡子來京

白頭老內兄來爲祝子生杏雨寒三月梨花泛數觥
似憐今歲苦頻問幾時榮欲去畱忠告休貪著作名
外甥劉珠自嘉興來

滿身梅雨色攜李至吾甥問訊高堂意攜將遠宦情

文章今日賤宅相幾時成歸向而翁說渭陽白髮生
賦得長安一片月

玉署吟秋與金臺見月華星辰白映雪宮闕碧成霞
鳧上梧桐小霜明鴻雁斜五侯絃管雜今夜照誰家

秋夜聽雨

秋雨澹人心瀟瀟入夜沉林搖宿鳥靜池泛落花深
倚枕書環肘挑燈事滿心乾封七載後無那嘆滛霖

病中喜雨

雷電今年瑞滂沱此日懽莫愁漂麥急只願洗兵寬
著竹香流葉傾荷翠寫盤病中兒作杖扶我看新巒

學源堂詩集 卷之四
余岱嶼游江浙還

游興君纔倦歸來意若何人情誰最薄吏道料同苛
那處無征伐頻年幾笑歌行藏休再卜急去買巖阿
中秋後二日同潘楚吟藤仙弟過城北崇慶寺
秋水和尚淨室

醉月有餘興招攜訪梵林出郊容散步聽水得空音
雨後鳴鳩婦沙邊立水禽尋僧雖未遇亦覺豁塵心

其二

寺古無須問蒼蒼樹十圍應門一衲瘦傷井九華肥
出定茶煙細談深棗葉飛別來知坐久簷鵲報斜暉

病起廬外野望

不是秋容澹寥寥病客情水天青不了雲樹白相生
去鳥孤煙杳寒花小徑橫遣懷頻悵望物候變蟬聲
高阜白雲

不知青阜迴但覺白雲偏樹密類開閣田高屢斷連
四時皆澹日一月幾晴天欲問英英起平山曲水邊
雙河碧水

兩泉村北合拍岸碧澄澄雨後魚藏荇看前鱗弄冰
雲來如過鏡波起不容昏幾度臨流賦濠梁得未曾
遠邨樹色

小邨數里接晴閣望如通樹有幾般綠花惟一片紅
斷煙高下鳥斜雨去來風若得舟橫水居然圖畫中
靜夜聽濤

萬騎喧吾枕譙樓箭正催風從月上靜濤自樹中來
定帶星辰滾莫將萍苻摧雲霓人悵望歡喜當聞雷
佛閣朝煙

一閣窗三面朝煙面面圍春寒不著樹地僻欲屯扉
白到河梁澹青來沙磧微可憐無五色謬作慶雲輝
早起野眺

爽絕登臨興朝煙淡不孤淺深村外樹來往水中鳧
眼底無車馬胷中得畫圖棘人方枕出不敢號潛夫
一老吟

有美城南叟皤然近百年臨流結草屋閉戶灌花田
宛轉五禽戲清幽一指禪客來談往事搔首望高天
苦暑

曾不因人熱今年想踏冰神情儼病酒氣味似親燈
恠事桃笙暖謊言火井升正尋河朔避有客索題綾
蘆溝橋望潭柘山

十年空拄笏煙靄悵難攀偶涉桑乾水因看潭柘山
雁迴十里外雲起數峯間佛子馴龍處霞生盡日斑

贈趙州和尚

時爲藩邸延致

會傳天竺鉢雲水意蘊蘊錫杖停金馬禪心老木魚
幾行智永字一卷道林書佛法無須遣人情已太虛
雨後望家信

喜雨沉痾減懷鄉旅思增業惟百畝稼官是一條冰
帝里霑如此家園恐未會長鬚不肯至塗說尙難憑
辛酉春偶過天寧寺有感

寺與年華改閒來感歎增吟呀驚敗壁斃躓見殘僧
氣候如秋老雲煙任鳥騰莊嚴失浩劫空法亦難憑
春夜聽雨

愁心無可慰晨夕望春霖忽暗窗前月微聞樹裏音
簷花千點下砌雷五更深明日扶藜出晴郊看碧岑
燥兒自東安來省余於天寧寺瀕行書此付之
衝暑離安次慙慙定省來衣猶前歲葛僕是十齡孩
夜話傷貧病家園歎草萊如斯卽宦况莫作北門哀
移寓慈仁寺

五月三移寓行勝總傍僧蕭條非逆旅闌寂亦迦陵
梅雨桃笙濕薰風蘭穗蒸但能書麓穩不忍更軒騰
馮胎仙貽桃一筐

不作歲星偷桃園枉夜遊傾筐欣有餽畱核欲何投

赤玉寒生液青霜暗送秋報瓊蕙底物拈韻檢詩等
移寓

何事頻移寓僦居量俸錢但容旋一馬豈想落三鱸
雪徑梅風掃春堂燕羽穿既能就寂寞不用賦歸田
其二

遷舍似遷官經營事事難書厨無兩脚香鴨枉雙翰
兒女因知累瓶罍動覺殘高山吾有調擬去閉門彈

七夕

秋以夕爲節傷予遲暮情星辰明遠樹風雨過高城
巧向何神乞涼於此夜生天河容易度只要鵲橋成

壬戌重九

無地插花籬重陽負酒卮秋聲楓樹遠寒露草堂滋
何處堪高眺今年覺更衰常參疎筆研佳節強吟詩
聞燁煉兩兒入庠

穉子詎能文相攜賦采芹姓名三世繼詩禮幾時聞
宮草聯書帶池魚吐墨雲而翁辛苦地敢望爾超羣
杭仲選令崑山

從政亦何有多君具達才民情玩水火田賦困蒿萊
拔礎知難信懸魚料不猜崑湖明月滿琴靜好銜杯
送賈水方同年令婺源

讀書改綠鬢爲政傷黃山一轡薰風裏雙鳧婺水間
大儒無小試茂宰有餘閒處處文公跡君其次第攀
送丁筠雪貳順德

一旆盪薰風看君佐郡行柏人尋古跡棠樹接家聲
地近郵書易官閒詩興清丞哉知不負屈指入承明
王四表弟來京

難後來相見潛然恨未除人偏信市虎我白念池魚
奇事增天問衰年望隸書佛言多果報歸去莫欷歔
慰瓶菊

宛宛瓶中菊輝輝強自妍澹人須爾對秋色欲誰憐
葉自迎寒露香應逼暮煙東籬金落早幸爾近青瑣
熒兒歸里有示

汝去方冬夜熒膏莫怠荒賀貧皆古道破悶有書香
歲歉刪殘客天寒緊報章近來鄉俗薄跬步學循牆
眎煒兒匱歸里

送爾歸鄉土汎瀾感路人一番爲父子千載竟灰塵
落葉寒丹旒濃霜濕縞巾別離當此際枯目斷秋旻
送魏昭士

何所見而去將無歎此間客情慚我淡文事樂君閑
夢向霜葭遠書來叢桂艱過庭如問我念昔淚潺湲

王崑良少參再守寧紹道

慨爲蒼生出重臨謝傅山鐵船真可渡棠樹老曾攀
威望傳軍壘恩波到海蠻越人食德舊踴躍識君顏
桑雨嵐少參山東督學報最擢粵東廣肇道

萬里莫言遠八蠻正待恩文昌原執法岳牧亦分藩
珠翠晴看市蛟龍夜到門嶺梅十月發折可寄西園
蔣芳萼補任督理浙江驛傳道

馮翊畱棠菱歌思二十年如何霖雨處偏向海江天
風景臨安勝詩才公琰賢佇聽浙越頌速不啻郵傳

五日

重午復重午燕京四十年青尊霜鬢客黃雀火樞天
襟襖何曾到菖蒲徒爾懸人爭酬令節吾獨惜玄蟬

送吳巽動進士令陽曲

晉陽我舊遊足風流雲白山懸瓮花黃石繫舟
人猶歌蟋蟀地不脫貔貅治劇君游刃行聽來暮謳

瓮山石舟
陽曲山名

許山濤太史假歸如臯

野水欲浮天聞君買去船書鈔中祕富鱸憶大江鮮
秋色明紅葉蒲帆裊翠煙揚州迤邐是畫錦記新篇
賦得秋月揚明輝

萬景秋來澹皎然獨月輪星辰白浸水花木冷含津
光滿知潮大華生喜鏡新瓊樓高幾丈須問折花人
趙雄麓主簿送親歸上黨

三年博望客見月放秋鵬去豈思尊菜行猶舞綵斑
白雲依潞水紅葉照壺關給事需桓範春風願爾還

乙丑中秋

雨霽天光濶秋分月魄盈此時誰不賞去日我偏驚
露下金波嫩風迴玉樹清瓊樓寒自迴或不似龍城

人日

丙寅

七日晴和甚天猶肯愛人世情春雪薄宦况夏虫噴

少見偏多性無才豈患貧縱然眠食好莫亦負吾身

連恕菴樞部出擢分巡青州道

尊翁曾
宦青州

司馬含香久分麾出脩兵節懸滄海日雨濶貝丘城
世澤甘棠近溪泉醴水清知君能報政暮月有歌聲

題潛籟軒

高人愛幽處小築白雲隈野徑憑風埽空軒待月開
不嫌瓦鵲噪只許葺冠來太古如山靜長吟日幾迴

丙寅中秋寄快園步月

露白園林夜扶筇當野遊螢高星動樹花澹月明樓
朋輩衰年少壺觴晚興稠此中無扞格不忍賦悲秋

徐子振武狀元分守寧海

奪錦朝丹陛分鑣向赤城中山宜似續大海佇澄清

虎帳天台對彤弓華頂明太平雖耀德上將寵簪纓

次劉止一贈韻

止一故安丘相國弟曾官粵東參將

誰猶識介弟汗湯作遊人池草寒春夢江風罷釣綸
伏波曾未老原憲那爲貧邂逅涕還笑千秋悟海塵

曝書

賴有青箱在其如白蠹侵傲人無富腹免俗亦狂心
共老流香古籤黃閱日深百城當不得徒說孝標滌
乞竹王翁

小築剛容鄰牕前曠草枯峻嶒老丈在瀟灑此君無
陶令荒三徑淇園菜萬株簪笈如乞我他日看雲扶

中秋

十載中秋月無如此夜清碧雲高鳥去白露暮煙平
老話驚孫子閒情憶友生酒酣憑杖起霜髮戴星明

重陽老友送菊

重陽空對酒老友送花來似解幽人意非夸隱士才
露寒蜂蝶少天濶雁鴻迴香發何妨晚畱連盡一杯

劉木水由代州貳擢守道陽州

五馬原侯秩三韓况齊鄉風能清代郡才可問南陽

海氣榆關紫秋花鐵嶺黃三年屈指是粉署待舍香
病起

病起如歸客亭軒恍舊遊菊從何日老雪向此君浮
散步青藜壯閒看白蠹稠呼童理鉛槧書債未全酬

嘲雁

丁卯九月

何處不聞雁聲情此夕殊去天纔咫尺得露任歌呼
萬里看紅葉十行寫碧湖寒暄獨爾慣來往似征夫
賦得涼雨消炎燠

林深暑燠積一雨灑然開不擬冰壺映疑從雪嶠回
葛香秋滿袖塵淨鳥銜苔大笑祝融氏莫當列缺厖

雨中遣懷

此身閒亦好容膝畝宮寬涼雨濯香徑新荷挺碧湍
願同鳩婦拙不學腐儒酸世事波濤甚衰翁壁上觀
火後重葺舍闔成

依舊難容駟徒來賀火書雀羅新徑密鳳字故人疎
儘可門題午無勞客駐車猶憐不近市草色似村墟
周茂卿書來兼寄六安茶

五年別倏忽萬事歎遷流我尙老而健君其貧不憂
酒泉常自拜茶史正重修火賀門無雀書來慰渴喉
伏日劉星五招同劉千之黃子昂李仁濟雅集

郊園遠翠亭

避暑寧須遠招攜愛野園無人不皓首有興此芳樽
花氣風分送鳥聲竹合喧敘談多感慨白眼看乾坤
七月朔登聚奎樓是日重修落成

久絕登高興茲來殊畢然西山青不了南畝綠無邊
天近憑誰問雲奇任爾旋築臺當日意莫漫負前賢

其二

阿閣欣重煥文翁化澤新宮墻存禮樂祥瑞像星辰
雞水環雙帶人家比萬鱗落成真可慶晴晝絕風塵
七月七日雨

見說舞雩禱雨師不自寧其零滋萬寶此夕隱雙屨
黍稌戎戎紫葵蔬泠泠青酒材天與足皆醉獨難醒

聞蟬

氣候蟲先得新蟬愴我心繁聲催白髮落日澹蒼林
鏡裏看勲業牀頭夢古今此身衰甚矣愁聽爾長吟
沈遠公移家德水

誰破門前雪休文賦別離十年勤北學一日愛南枝
觀海滄溟小攀雲日觀危錦囊如得句好寄老夫知

立春

春從何處立風色卯時隲一點青心柳七分綠萼梅

田家為壽酒太史候寒灰珍重雙柑在黃鸝旦夕來
病後至快圃

學步僮為杖蹒跚到墨莊履痕十二級

臺高丈二尺

花信

廿三場桃已紅飄雪鶯猶青啄香繩床聊憩息輒欲

整詩囊

五日

一年幾令節香艷獨蒲榴安得老而健其如貧且愁

杜門懸虎艾錯夢到龍舟此日猶乾旱徒勞雲漢憂

青城孫入邑庠

乍覩床前拜阿孫賦采芹燕詒吾有愧繩武爾應聞

寶氏一枝桂魏公五色雲前賢多好事奚祇欲能文

默坐

默坐常終日離騷與病多佛云不可說子曰如之何

長晝喧檐雀微風偃砌莎靜中別有悟非是學維摩

久陰不雨

油然非一日霖霖幾曾沾誰敢作天問人爭向月占

葉乾蟬苦抱花瘦鳥空銜莫漫愁時物街頭米價添

對鏡

對鏡啞然笑阿誰此一翁分明如病柏猶苦學雕蟲

潘岳頭飛雪少陵耳問風文章與勛業只可付秦銅

贈唐右章巡檢

我久樂郊適聞君異績多詰戎鄉遂靖領尉市城歌
廉吏塵封甌神功虎渡河腐賢臺使在早晚土鑿坡
九日無菊

草堂鴻雁去不見菊花開那無錢買何曾有雨催
野菴藏落葉寒露濕高臺得酒亦云快狂吟杯復杯

師琅友宰通山

鶴班家世濟君獨課蠻寶百里言游宰三年卽墨封
蠟梅夾路發竹馬到江逢楚澤雲霓望隨車雨定濃
郝鈍齋牙史河東視離竣過郡相照

驚我門前雀亭軒枉牙冠詫看顏鬢改愁說野田乾
猗頓池生荻薰風亭臥獮此中關大計賴爾是言官

皇華館偶題

勝地闢郵亭荷風入座馨沿城一水碧當戶數峯青
花自名君子人誰應德星幽情難暢敘對此覺微惺

郊圃茅屋成

東臯偶小築十畝綠中分屋狹難棲燕墻低不礙雲
桔槔鄰戶牖蝴蝶上衣裙預想田家樂秋來飯煮芹

五日

老人愴節序不獨與寥寥無術能焚魃多愁枉啖臬

學海堂詩集 卷之四
榴紅花落落蒲綠影蕭蕭百口須珠粒東疇麥半焦
賦得密雲不雨

正切霓雲望靄靄忽簇天何人不禱爾終日但油然
離畢非今月乾封已去年將無造物者真欲滌山川

喜雨

今日纔霑足軸簾進一杯瀑簷真是瑞潤礎不須猜
撥刺魚相戲歲蕤花漸開西疇聊一望襍裊喜紛來
送邵子昆明府應 詔赴闕

卓犖君爲宰循聲噪日邊社城摧老窟虞芮棄閒田
行塞人歌母發倉戶戴天省台虛左待知不作寒蟬

客問

莫訝余何瘦請看肥者誰話貧嫌客至索債得奴欺
帶緩秋衣改鞍輕老驥知總然能戰勝肚不合時宜
南發里中親友暨藤仙弟熒兒送至石橋店

暑氣屯高柳愴予事遠征親朋愁旅食子弟計歸程
嘶馬旗亭急飛鳶野甸橫石橋揮手處去住各含情
河間道中

高滄環瀛郡河間以此名樹烟濃海氣沙鳥亂溪聲
一水燕齊界雙星箕尾明輪蹄何滾滾直北是神京

登泰山

五嶽非吾志泰山偶一登何嘗天下小只是日低升
雲霧觀生氣碑銘慨代興無人吟梁父辜負此峻嶒

天妃聞

一插關三水猶虞輓運稽 君王方旰食民力此金

隄樓閣懸危岸餘艤立淺溪俄傳赤羽至狹路有雲

迷

露筋祠

水岸懸孤廟春秋 酹女郎碑文難盡信遺事亦堪傷

泣月冰魂渺迴風 玉骨香祇今白鳥媿不復響祠傷

登瓜州大觀樓

豈有乾坤眼茲樓獨大觀山眼吳楚秀地坼海江寬

戰伐千年蹟風霜萬里翰金焦與北固直作檻前看

呂城

水店畱人姓築城紀呂蒙民餘三國後地衍大江東

紅葉霜纔染白橋月乍空雞豚賤于穀不問是年凶

虎丘

不斷有人遊將無是虎丘兩門隨岸闢一水抱峰流

酒茗僧家市菱銅賈客收書生無劔試空到此山頭

瓜洲阻風時大兵班師至京口

無風江亦險况復橫艤艫返棹尋瓜步鳴榔入荻叢

水光弓月上人影翠禽中莫漫悲濡滯爭如簑笠翁
其二

水關容鼓柁宛轉度雙橋魚雷傾殘市鴛塘浴早潮
綠窗人覩客紅樹鳥鳴宵悶與愁相積偏聞渡口囂
其三

遠岸浮江滸雄城跨水洲暝烟長慶寺秋色大觀樓
司馬勞分刺將軍控上游海氛談往事指點數荒丘
其四

聞道江風急兵船坐潤州兩城纔咫尺三宿又淹留
酒薄吟詩醉萸殘聽雁愁行踪渾莫定來往歎浮鷗

泊江口步月看金山寺

梵林宜見月尤喜見金山江影菱花鑄五日石光玉

帶環東坡寒青連碧島虛白動霜灣步履滄波上疑
來天漢閒

惠泉

一勺石泉響千秋陸海聞薜烹經外史酒釀頌參軍
甘豈臣心似清將人鏡分若爲天下雨不讓泰山雲
不寐

客子多鄉夢愁心劇可憐叫雲驚浦雁破月聽江船
一枕三千里五更六十年非非與咄咄無可奈何天

學源堂詩集 卷之四
九日飲維揚許氏園

客況憐佳節招尋過辟疆行依石磴曲坐受竹籬香
濯雨芙蓉砌畱雲薜荔牆引杯懷暫放莫更憶柴桑

過丹陽

地已趨吳境人猶帶楚風舟車能竝用魚稻不偏豐
草掩陳東墓河環季札宮文章與氣節今昔可還同

舟中雨望

秋雨澹人心孤舟倚櫂吟雲來山吐氣鳥集樹調音
不惜青帘濕獨憐紅葉沉望中空翠滴知是鶴林濱
顧筆堆太學招飲池亭用杜少陵遊何將軍園

林韻

爲赴虎頭約頻過虹影橋高楓蔭僻徑淺水漾秋霄
門狹籃輿入賓遲折柬招拳帷貪看竹五里覺非遙

其二

過庭循曲檻步履漸幽清老石疑蹲虎新蟬學嘒鶯
梅漿寒代茗蒲筍嫩堪羹列座斜臨水人從鏡裏行

其三

宛轉石梁築參差水柱支去尋烟外柳已到閣前池
日上荷全覆風來魚不知新秋暑未處爽氣快同披

其四

小閣騎山子沿山幾本花葉穿雲似鳥竹抱石如蛇
指顧亭原近紆迴路却賒分明籬落隔不是別人家

其五

夕陽忽滿席亭畔小樓開不大三間屋曾容幾樹梅
雨宜花氣入晴喜月光來俗客應稀至請看石上苔

其六

堆雲傳綠野碎錦榜平泉別墅君家勝幽尋我力綿
拙鳩藏柳瘦貪燕掠荷錢欲倩滄洲筆拂牆畫輞川

其七

客至宜忘返敢言荀令香避苔絲履濕移簞葛衣涼

座已無人醒室猶有酒藏與儻莫促迫直待日頭蒼

其八

朔客高陽侶西園習氏池紅添子美面白倒季倫羅
不使肺容酒誰能齒有兒夜遊如秉燭懷老更追隨

其九

日涉方爲趣翳林奈晚雲不成金谷句真愧玉堂文
蟲語催花細茶烟入樹分此時歸正好涼月白紛紛

其十

一流人物在悲憫奈愁何天際青雲過翕前白髮多
畱賓鶴欲舞歸路鳥爭歌浪迹余無定花黃客更過

冬之夜

我欲天不夜其如冬夜長
家園興復事江月幾逾光
寺遠沉鐘鼓雞寒報雨霜
無須歌扣角急起蓬萊桑

吳江道中

冬至猶多雨江行況有風
帆開霜雁斷雲起蠟梅空
小市三千繭長橋五十虹
無邊嵐霧翠都在太湖中

桐鄉道中

不是古桐鄉風流亦自良
一村一水港數里數魚塘
浦雪迷君竹江颺落女乘
皂林古戢壘烟霧尚蒼茫
雪夜泊塘栖

倚棹吟無賴愁聞雪打篷
樹烟十里暗漁火一星
水白酒難買夜行船不通
西湖應皎皎好去看瑤叢

仙人粉

一種仙人粉凝霜似不灰
石名柔白可為爐禹餘糧有類

子飯堪猜掘鼠窮泉水剝
榆廢屋材民饑無可食三
咽有誰哀

題林天爻荆谿小隱圖卷

君寧隱者流何事住林丘
王粲原非客邵平故是侯
樹烟來几上山色滿騎頭
我識為圖意巖深且寄愁

天多聞人曾為毘陵
別駕寄家陽羨山中

至西湖寓昭慶寺

古寺來新客西泠正朔風山嵐消雪碧木葉染霜紅
遠景樓窗外寒烟水徑中貪逢僧話久鐘靜梵王宮

西湖望雪

雪暗山增勢天低水有圍樹花衝鳥散漁艇入烟微
遠近毫光寺縱橫柳絮扉不聞游客至只見野僧歸

樓牕望寶樹塔

寶樹人同望開窓我獨偏軸簾當一面揮翰對重巔
鳥語寒光裏鐸聲夕照邊只愁明月上白與水相連

玉泉寺



